

Charla riba 'Descendencia di nos Poblacion' di Dr. Wever den Barrio di San Nicolas

ORANJESTAD (AAN): 'Fundacion Herencia Historico di Aruba' (FHHA) ta continua su gira den e bari-onan di Aruba cu e 'Charla di dr. Oswald Wever'. Un biaha mas dokter ta bay hiba e mensaje di su investigacion pa su pueblo. Mas di shen (100) persona a yena e sala di 'Centro Curason Santa Cruz. A bira un mainta sumamente interesante cu un tremendo interaccion. Meta di FHHA ta: Duna informacion y e version corecto di e historia di Aruba. Ta p'esey e fundacion ta opina cu tur hende aki na Aruba mester haya oportunidad pa cera conoci cu e resultadonan di e investigacion cu dr. Oswald Wever a realisa riba e terreno di DNAmitocondrial cerca e poblacion Arubiano.

Actualmente henter mundo ta ocupa su mes cu DNA. Considerando e mudanza masal cu ta tumando lugar foi e continente Africano pa esun Europeo, den futuro e enfoque riba descendencia etnico-geografico lo bira mas fuerte.

Pa medio di un esqueleto, ciencia por a registra t'e cu awor cu hende a cuminsa ta existi 190.000 aña pasa na Africa pa medio di e asina yama 'Eva mitocondrial'. Na momento cu descubri un otro esqueleto na cualkier parti di mundo, esaki lo cambia e teoria completamente.

Historia ta relata cu Aruba tabata habita pa Indjannan Caquetio na momento cu e colonisado homber Europeo a pisa tera. Y nan a bay ta procrea cu e muhenan Indjan. Na aña 1833 Censo ta registra cu e poblacion Arubiano tabata conoce tres origen: Indjan, Europeo y Africano. Ta wordo supone cu algun colonisado Europeo di Corsow a trece catibo Africano bin biba na Aruba.

Ya foi aña 1957 dr. Oswald Wever kier a haya sa con e poblacion di su Pais ta hinca den otro. E resultado di un estudio tocante 'grupo di sanger' cu e dokter Hulandes de Ruyter a hasi na LAGO hospital

bao di 4000 hende muher, a bira indicativo. Dr. Oswald Wever su conviccion tabata semper cu no por tabata un casualidad cu tabata tin Indjan ta biba na Aruba y cu un rato despues nan lo a wordo reemplaza pa Europeo y Africano. E continuidad etnico traspasa pa medio di nos mama, abuela, bisabuela, tatarabuela, nos bisatatarabuela t'e cu 34.000 aña pasa a hasi cu awe den forma científico por a comproba e origen Indjan den e poblacion actual di Aruba. Nunca e pueblo Indjan a wordo extermina aki na Aruba! No obstante e migracion, e descendencia etnico-Indjan cerca e Arubiano t'e cu awe ta existi y lo continua pa siglonan cu ta bin.

Con asina ciencia genetico ta funciona? Pa medio di diferente testnan DNA cu ta wordo realisa den laboratorio por determina e marcanan hereditario (caracteristico) cu un persona ta traspasa pa su siguiente generacion. Di e forma aki por yega na e haplotipo na cual un persona ta pertenece. Si esaki ta cuadra cu cierto grupo den un poblacion (haplogrupo), por conclui cu esey ta e origen etnico-geografico di e persona: "Indjan, Africano of Europeo".

E investigacion di dr. Oswald Wever a encera e test mitocondriaDNA. Den e caso aki ta trata específicamente di e marcanan hereditario cu ta wordo traspasa directamente y solamente pa medio di e mama pa tur su yiunan: tanto yiu muhe como yiu homber.

Ciencia genetico ta requeri pa hasi uso di faamnan pa comproba cu e origen di un pueblo ta bay back t'e pa tanto generacion. Pa cumpli cu esaki un lista di faamnan Arubiano a wordo registra y documenta cu a cubri tanto e epoca di colonisacion como esun di esclavitud. Puntonan di salida tabata: cu e isla di Aruba tabata habita na momento cu e colonisado a pone pia den nos pais (1499) y na di dos

lugar cu tabata biba hende na Aruba na momento cu LAGO a establece (1924) su mes na Aruba. Despues di esey a tuma lugar migracion masal.

Conhuntamente cu un instituto renombra na Caracas Instituto Venezolano de Investigaciones Cientificas (VIC) y Universidad de Puerto Rico nos investigado di poblacion-genetico aki na Aruba - dr. Oswald Wever - a studia e estructura di nos poblacion.

Resultado final di e testnan den laboratorio na aña 2011 a comproba dos balor importante. Cu a pesar di e mezcla etnico cu a tuma lugar, e poblacion Arubiano pa 53 porciento tabata consisti di haplogrupo D (Indjan) y na di dos lugar cu haplogrupo D ta esun dominante na Aruba. Prueba científico cu no obstante migracion e descendencia etnico-Indjan cerca e Arubiano t'e cu awe ta existi y lo continua pa siglonan cu ta bin. E muhe Indjan-Arubiano lo percura pa esey.

Nos no mester confundi 'nacionalidad' cu 'descendencia etnico'. 'Nos tur ta Arubiano, di nacionalidad Hulandes y nos tin tres origen etnico. P'esey e consejo di dr. Oswald Wever ta: Bo no mester confia den e imagen cu e spiel ta mustrabo, sino kere den e perfil mitocondriaDNA cu ta uni abo cu bo pueblo.

Diadomingo awor 13 september proximo, Fundacion Herencia Historico di Aruba cu sosten di UNOCA ta presenta un biaha mas e Charla informativo/educativo di dr. Oswald Wever. Esaki ta tuma lugar na Centro Santa Teresita na San Nicolas foi di 10:15 di mainta t'e cu 12:00 'or di merdia. Henter pueblo di Aruba, pero especialmente e pueblo di San Nicolas ta keda cordialmente invita. Lo tin algun bocadushi y bebida crioyo pa refresca e mainta. Un y tur ta BONBINI. Entrada ta gratis. Un boca bisa otro. Esun cu no busca su raiz, nunca lo sa su destino. Un proverbio Indjan.